

Valero: "To be or not to be"

Editorial

Pa: Victor (Toko) Winklaar

Valero Energy Corp ayera a participa na New York, cu e ta suspende operacion di e refineria di Aruba, debi na un mercado hopi debil y cu no ta produci ganashi necesario. E noticia, apesar cu el a ser spera hopi dia caba, a crea inquietud den varios sector, incomodidad serca Gobierno, pero e mensahe di Valero Energy Corp, ta laga e porta un tiki habri pa posibilidad di un reanudacion den proximo lunanan.

E comunicado di Valero Energy Corp ta muestra tambe claramente, cu no ta trata di un "shut down" ya cu ta sigui cu actividadnan den e refineria caminda e posibilidad ta habri ainda pa sigui cu operacionnan den futuro, mirando e esfuerzo cu Gobierno di Aruba a bin ta haciendo.

Bill Klesse, Presidente y CEO di Valero, a muestra den e comunicado cu negociacion y deliberacionnan ta continua cu otro gruponan, tanto esnan presenta pa Gobierno di Aruba, pero tambe pa companianan cu nan mes a acerca.

E planta ta sigui den funcion como terminal y como abastecimiento den proximo lunanan anticipando un reanudacion di trabou nan como refineria.

Por lo general e noticia aki ta negativo, ya cu a carga speransa cu refineria Valero Aruba lo keda habri y percura pa un cantidad di cupo di trabou y tambe e peso

grandi cu e tin pa economia di nos pais.

Sin embargo den henter e desarrollo aki rond di e refineria, mester muestra tambe riba e vision di Gabinete Mike Eman, cu a pone number di Aruba rezona rond mundo, cu su vision pa Energia Berde, energia sostenibel y saludabel.

Mientras cu e vision aki no ta totalmente realisabel a corto plazo, den cierto sentido, e ta linea recta contra di e esfuerzonan di Gobierno pa mantene e refineria habri, siendo cu mesun Gobierno a ser reconoci y elogia pa Gobierno di paisnan grandi, p'e esfuerzo grandi cu ta ser haci pa yega na crea posibilidadnan pa produci energia berde cu ta sirbi humanidad den su totalidad.

Lo ta na su lugar pa pais Aruba, cu e vision di e actual Gobierno, hinca tur energia den ehecucion di e vision berde aki, bira mas agresivo na logra crea posibilidadnan caminda por produci energia mas barata pero na mes momento energia cu ta sigura existencia di henter mundo pa siglonan cu ta bin.

Eincomodidad cu e desaroyonan rond di e refineria ta produciendo, no por reduci e esfuerzo y determinacion di Gobierno y Aruba, pa yega na concretiza e vision pa energia berde.

Si den futuro en realidad e refineria dal sera definitivamente, anto e sitio aki tin cu ser converti den un parke grandi pa produci

energia di biento, energia for di e forsa di lama of energia pa medio di gas natural, caminda Aruba lo bira conoci mundialmente, como e prome pais cu lo biba totalmente riba energia berde.

Ta di reconoce y elogia e esfuerzo cu ta ser haci pa principalmente Minister Presidente Mike Eman y henter su Gabinete pa logra cu refineria di Valero ta keda habri, pero na mes momento ta duna un conformidad cu Aruba n'e momentonan aki, tin un Gobierno cu tin un vision concreto di loke mester bira e futuro di nos pais riba tereno di energia.

Nunca tabatin un otro Gobierno cu a duna e atencion na energia berde manera aworaki t'e caso, y hasta por bay asina leu di bisa cu e pueblo di Aruba por ta totalmente trankilo, cu e tin un Gobierno na mando n'e momentonan aki, cu ta logra scapa nos pais hopi tempo y esfuerzo pa logra energia alternativa cu henter mundo ta buscando.

Fuera di e vision riba tereno di energia berde, Gabinete Mike Eman tambe a bin ta ehecutando un plan di maneho pa cambia cara di henter e isla, ehecutando varios proyecto cu lo duna nos isla un cara nobo y distinto, cu turisticamente sigur lo trece beneficiacion grandi pa su economia.

Mientras cu Oranjestad no ta muestra nada placentero n'e momentonan aki cu varios

proyecto den ehecucion, ya caba por mira den forma minimal, e cara nobo cu Aruba lo haya ora cu e proyectonan aki keda termina.

Pues hasta riba e aspecto economico, por bisa cu Gobierno di Aruba a anticipa y ta trahando riba un futuro sin refineria di e isla di Aruba.

No ta cuestion di sostene e actual Gobierno di Aruba, esta Gabinete Mike Eman, pero ta un hecho cu Gobierno actual ta ehecutando un vision concreto cu lo duna mas realce y mas contenido na nos isla como isla turistico.

Un isla cu lo ta totalmente diferente cu otro islanan turistico y caminda no solamente cara di e isla lo ta diferente, pero caminda e desaroyo turistico aki lo ser carga den tur

skina di nos isla, pa tur ciudadano di nos pais.

Mientras cu e desaroyonan rond refineria Valero ta preocupante, e capacidad di nos pueblo pa sali dilanti, pa supera cualkier obstaculo, mester t'e fuente di inspiracion cu cosnan lo sigui mihor den futuro.

Politicamente e lo ta un expresion no mucho popular pa termina e Editorial aki cune, pero en realidad nos pais tin e mihor Gobierno n'e momentonan aki, pa atende cu e situacion di refineria Valero y cu futuro di nos isla.

